

INGUMATXO GEZNARIA

Otsalar

Nire leioko liliartera,
etorri berria,
lorarik-lora egurastera
ingumatxo ikusgarria.
Iduritzen zait agertu dala
egaztizko lili eijerra
nire biotz lilluratua
maitekiro alaitzera.

Bere ega dantzaria,
margo parerik gabea.
Gauza orren txanbeliña,
nola asmatu al zenun Jauna ?
Ibilkera du ain ariña
zirrikatzen duena ortzia ;
zalantzarik gabe da
jolas-loretzat egiña.

Duen ekitaldi laburra,
liliz-lili, aldakorra :
orain begonia, gero krabeliña ;
jeranioan du tankera berria.
Ingumatxo maitea :
nire leioan lorea,
zelai-basoetan urrezko orria,
zeruan aingeru pitxia.

... egaztadaz, kulunka,
printza dizdiratsuak dariola
aldendu zaida inguma
leioetan zear, lorez-lorezka...
Arkituko al duk, bera ;
nire biotzeko lili kuttuna,
Kupido'k gezitu zaidana
eta, nire geznaz, emaiok pa.